

**Roma 6:23 Sabab opana dusa paneka pate; nangeng odhi' se saongguna sareng langgeng asareng Guste Isa Almasih paneka paparengnga Jehovah se ma-coma.**

**Roma 8:2 Sabab hokomma Errohna Jehovah se andaddiyagi sampeyan sareng kaula sadaja odhi' daddi settong sareng Isa Almasih ampon mabebas kaula dhari hokom se daddi lantaranna dusa sareng pate.**

**2 Timotiyus 1:10 Ban sateya, Jehovah noduwagi rahmadda jareya ka sengko' ban ba'na kalaban rabuna Rato Panyalamedda sengko' ban ba'na, iya areya Isa Almasih. Isa makala kobasana pate ban abakta odhi' se langgeng kalaban parantara'anna Kabar Bagus.**

**Ayyub 5:2 Pera' oreng se budhu pekkerra se mate polana sake' atena.**

**Hoseya 13:14 Bangsa reya bi' Sengko' ta' epasalamedda dhari kobasana dunnyana oreng mate. He, pate, mara pabalattra wabahna ba'na! Jalannagi lalakonna ba'na se maancoran jareya! Sengko' ta' neser pole ka bangsa jareya.**

**Jabur 9:13(14) Oladi, Guste, abdidalem epanyangsara moso, kabellasi abdidalem, GUSTE, lopoddagi abdidalem dhari maot sareng pate,**

**Ayyub 6:26 Sabarang tang oca' bi' ba'na eanggep angen malolo; daddi apa gunana ba'na nyaodi sengko' se arassa la ta' andhi' pangarebban reya?**

**Ayyub 33:22 Oreng jareya para' mateya, dunnyana oreng mate la semma' ka aba'na.**

**Hizkiyel - Yehezkiel 37:12,13 Daddi kassa' ba'na aramallagi ka Tang ommat Isra'il ja' Sengko' GUSTE Jehovah Se Mahatenggi mokka'a koburanna. Tang ommat jareya bi' Sengko' epakalowara dhari koburan jareya, pas epabaliya ka tana Isra'il. 13 Saellana Sengko' ajalannagi jareya kabbi, Tang ommat bakal taowa ja' Sengko' PANGERAN.**

**Matiyus 27:52 Kam-makam bungkar, ban bannya' ommadda Jehovah se la mate odhi' pole.**

**Kadaddiyan 2:7 GUSTE Jehovah laju mond hut tana sakone', pas ebadhi manossa, manossa jareya eparenge nyaba se maodhi', se eserrobbagi ka dhalem lobangnga elongnga; daddi manossa jareya pas odhi'.**

**Kadaddiyan 6:17 Sengko' madhatengnga banjir ka bume reya sopaja mahlok se odhi' padha'a mate kabbi. Sabarang se badha e bume reya bakal mateya kabbi.**

**Kadaddiyan 7:15 Lok-mahlok se odhi' jareya maso' dhu-sajudhu ka dhalem paraona, abareng ban Ennoh,**

**Kadaddiyan 7:22(21-23) Mahlok se odhi' e bume padha mate kabbi, epatompes bi' Jehovah: manossa, keban ban no'-mano' tadhya' karena. Se**

**gi' odhi' coma Ennoh ban reng-oreng sarta ban-keban se badha e parao jareya.**

**Ayyub 12:10 Jehovah se ngator odhi'na mahlok cepta'anna; se kobasa ka nyabana saneyap manossa.**

**Ayyub 33:4 Erroh Jehovah nyepta'agi sengko' reya ban apareng odhi' ka sengko' e dunnya.**

**Caretana Para Rasul 17:25 Jugan Jehovah gapaneka ta' marlowagi bantowanna manossa, sabab Jehovah gapaneka se apareng odhi' sareng nyaba sareng sadajana ka manossa.**

**Wahyu 13:15 Keban se kapeng dhuwa' ganeka eedine aberri' nyaba ka arca ganeka, daddi arca ganeka bisa acaca ban mate'e sadajana oreng se ta' poron nyemba ka aba'na.**

**Yahya 10:10 Mon maleng maso' maksodda pera' co'-ngeco'a, mateyana otaba ararosaga. Tape Sengko' dhateng sopaja manossa padha'a odhi' -- odhi' ta' kakorangan pa-apa.**

**Yesaya 28:15 Ca'na ba'na la mabadha parjanjiyan ban maot sarta sarembak ban dunnyana oreng mate. Ba'na arassa yakin balai se bakal dhatengnga jareya ta' kera ngenneng ka ba'na, sabab ba'na ngangguy cara se salenter kaangguy masalamet aba'na.**

**Yesaya 28:18 Parjanjiyanna ba'na ban maot epabattala, rembagga ba'na ban dunnyana oreng mate epaburunga, daddi mon balai dhateng, ba'na bakal ancora enyek-enyek.**

**Yesaya 5:24 Ba'na nolak pangajaranna PANGERAN Se Mahakobasa ban yanyeza papakonna Jehovah se socce se esemba Isra'il. Lantaran jareya, akantha darameyan ban rebba kerreng se obus ekello' apoy, bariya keya mo'-ramo'na ba'na bakal bucco'a, bang-kembangnga bakal kerrenga ban obus eabber angen.**

**Yow"el 1:12 Bungkana wa'-buwa'an e teggal padha kerreng tadha' dhaunna; bungkana anggur, appel, ara, korma ban dalima. Daddi ra'yat ta' gumbira pole atena.**

**Hoseya 13:15 Maske Isra'il ma'mor akantha rebba se landhu, tape Sengko' ngerema angen temor se panas dhari sagara beddhi. Angen jareya bakal makerrengga ber-somber ban mor-somor, sampe' sabarang se aji tadha' karena sakale.**

**Wahyu 22:1 Malaekat ganeka noduwagi jugan ka kaula songay se aengnga madhateng kaodhi'an. Songay ganeka arap-galirap akadi kristal ban agili dhari tahtana Jehovah ban Cacempe ka'issa',**

**Yahya 4:10 Dhabuna Isa, "Ja' sakenga ba'na tao ka paparengnga Jehovah ban tao sapa se menta aeng enom ka ba'na, tanto ba'na dibi' se menta aeng enom ka oreng jareya, ban oreng jareya tanto apareng ka ba'na aeng kaodhi'an."**

**Yahya 4:14 Tape oreng se ngenom aeng baberri'na Sengko' ta' kera pelka'**

**salanjangnga. Sabab aeng baberri'na Sengko' jareya bakal daddiya somber e dhalem aba'na se nancel kalowar ban madhateng odhi' se sabendherra tor langgeng ka aba'na."**

**Parompama'an - Bangsalan 13:14 Pangajaranna oreng se bicaksana reya somberra kasennengangan, e dhalem babaja, pangajaran jareya panyalamedda ba'na.**

**Parompama'an - Bangsalan 14:27 Tako'ban ta'at ka PANGERAN reya somberra kasennengangan, ban jalan kaangguy ajauwi pate.**

**Hizkiyel - Yehezkiel 13:17-23 PANGERAN adhabu, "Sateya he, manossa se ta' langgeng, abassagi babine'an se atengka akantha bi-nabbi bine' e antarana bangsana ba'na rowa. Koca'e reng-oreng jareya, 18 ban kabala apa se ekoca'agi bi' Sengko', GUSTE Jehovah Se Mahatenggi, ka reng-oreng jareya: 'Palang ba'na! Ba'na agabayyagi sakabbinna oreng lang-gellang Jimat ban dhung-kodhung sakte, sopaja reng-oreng se ngangguy bisa'a ngobasae odhi'na oreng laen. Ba'na terro ngobasa'ana odhi' matena Tang ommat, ban kobasa jareya bi' ba'na eangguy nyare kaontonganna dibi'. 19 Ba'na ya-nyeya Sengko' e adha'na Tang ommat pera' polana terro olleya gandum barampa pergем ban roti barampa kerra'. Reng-oreng se ta' sala bi' ba'na epate'e, dineng reng-oreng se sapantessa mate bi' ba'na epanneng ta' epama-baramma. Ba'na malae barang se cek-lecek ka Tang ommat, ban Tang ommat parcaya ka ba'na.' " 20 PANGERAN Se Mahatenggi adhabu ka babine'an se atengka akantha bi-nabbi bine' rowa, "Sengko' baji' nangale'e lang-gellang Jimat se eangguy ba'na kaangguy ngobasae mate odhi'na Tang ommat. Lang-gellang jareya bi' Sengko' esendhala dhari lengngenna ba'na, ban reng-oreng se ekobasae ba'na bi' Sengko' epabebasa. 21 Dhung-kodhung saktena ba'na bi' Sengko' ese bida, dineng Tang ommat bi' Sengko' epalopoda dhari pangarona ba'na se juba' salanjangnga. Daddi ba'na tao ja' Sengko' reya PANGERAN. 22 Reng-oreng becce' se bi' Sengko' ta' epama'-baramma'a, bi' ba'na ecek-lecegi sampe' padha kene' ate. Reng-oreng jahat bi' ba'na eparaja ate sopaja pagguna dusa ban ta' epasalamet. 23 Sateya ton-pangatonan palsu ban mal-ramalanna ba'na se lecegan jareya la ta' ekenneng paterros pole. Sengko' masalamedda Tang ommat dhari pangarona ba'na se jahat. Daddi ba'na tao ja' Sengko' reya PANGERAN."**

**Yeremiya 21:8 PANGERAN pas makon sengko' ngoca' kantha reya ka ommadda, "Edhingngagi! Sengko', PANGERAN, aberri'a jalan ka ba'na; ba'na olle mele: jalan se nojju ka odhi', otabana jalan se nojju ka pate.**

**Ayyub 34:22 Tadha' petteng maske sampe' calemodan, se ekenneng gabay pangeteggan kaangguy dusa ban kajahadan.**

**Jabur 16:10 Sabab sareng Junandalem abdidalem epalopot dhari kakobasa'annepon maot; Oreng se sareng Junandalem ekataresnae epalopot dhari pate.**

**Jabur 23:4** Sanare abdidalem lebat e cora se petteng, **GUSTE**, abdidalem ta' tako' sakale ngadhebbi babaja, sabab Junandalem asarengnge abdidalem. Sabab Junandalem ajaga abdidalem akadi oreng ngowan se ajaga dumbana sareng tongket ban gadana

**Jabur 30:3(4)** Junandalem malopot abdidalem dhari alam maot, maodhi' abdidalem dhari antarana reng-oreng mate.

**Jabur 49:15(16)** Tape Jehovah tanto malopot sengko' dhari kobasana maot.

**Jabur 56:13(14)** Sabab Junandalem malopot abdidalem dhari maot, Junandalem ajaga abdidalem sopaja ta' labu. Daddi abdidalem kengeng odhi' e dhalem pangaobanna Jehovah, e dhalem sonar se nerrange sadajana se odhi'.

**Jabur 68:20(21)** Jehovahna sengko' ban ba'na reya **PANGERAN** se apareng kasalameddan. se mabebas sengko' ban ba'na dhari pate.

**Jabur 89:48(49)** Pasera se bisa odhi' terros sareng ta' mateya? Pasera se bisa lopot dhari koburan?

**Jabur 102:19,20(20,21)** **PANGERAN** ngoladi dhari kalenggiyanna se tenggi, dhari sowarga nyongngo' ka bume, 20(21) meyarsa'agiya serrona oreng tahanan, mabebasa reng-oreng se eokom mate.

**Jabur 116:8** **PANGERAN** la malopot sengko' dhari pate; sengko' elepor ban ejaga sampe' sengko' ta' labu.

**Parompama'an - Bangsalan 10:2** Kasogyan se ekaolle kalaban cara se roce ta' madhateng kaontongan; sabalingga, kajujuran bakal madhatengnga kasalameddan.

**Yesaya 26:19** Ommattepon Junandalem se mate badhi odhi'a pole, yit-mayyidda badhi jaga'a pole. Oreng se ampon ekobur e dhalem tana bakal jaga'a sareng rak-soragana. Akadi ebbun se macengngar bume Junandalem maodhi' ommadda se ampon abit mate.

**Yahya 5:28,29** Ba'na ja' heran mon ngedhing jareya; sabab bakal dhapa'a baktona oreng mate kabbi padha ngedhinga sowerana, 29 laju kalowar dhari koburanna. Oreng se alako becce' bakal jaga'a kaangguy odhi'a, tape se alako juba' bakal jaga'a kaangguy narema'a okoman."

**Yahya 10:28** Bi' Sengko' ba-dumba jareya eberri'i odhi' se saongguna ban se langgeng, ban salanjangnga ba-dumba jareya ta' kera mate. Tadha' oreng se bisa arampas dumba jareya dhari Tang tanang.

**Yahya 11:43,44** Saellana mare se adhabu kantha jareya, Isa laju aera' epakaja, "Lazarus, kalowar!" 44 Lazarus se la mate jareya laju kalowar dhari koburanna. Tanang ban sokona gi' ebetbet ban kaen kapan, bariya keya mowana gi' etotop ban kaen totobba mowa. "Bukka' kaen kapanna me' olle bebas ajalan," dhabuna Isa ka reng-oreng se badha e jadhiya.

**Yahya 12:17** Reng-oreng se hadir teppa'na Isa adikane Lazarus sopaja kalowar dhari koburanna ban epajaga saellana mate, nyaksene kadaddiyan jareya.

**Yahya 17:2 Rama marenge Pottra kobasa ka sadajana ommat manossa, sopaja Pottra aparenga odhi' se salerressa sareng langgeng ka sadajana oreng se sareng Junandalem eparengngagi ka Pottra.**

**1 Korintus 15:19-26** Mon pangarebbanna sampeyan sareng kaula sadaja namong abates ka odhi'na sampeyan sareng kaula sadaja e dunnya paneka, sampeyan sareng kaula sadaja paneka se paleng palang! 20 Nangeng nyatana Almasih ampon epaodh'i pole dhari sedana. Ganeka menangka tanggungan ja' reng-oreng se ampon seda bakal epaodh'i'a pole. 21 Sabab pate maso' ka dunnya kalaban parantara'anna settong oreng, sapaneka jugan odhi' pole dhari mate eparengngagi ka manossa kalaban parantara'anna settong oreng jugan. 22 Manossa sadajana mate polana tamaso' settong golongan sareng Adam, sapaneka jugan sadajana bakal epaodh'i'a, polana tamaso' settong golongan sareng Almasih. 23 Nangeng saneyap oreng bakal epaodh'i'a pole menorot giliranna: dha'-adha'na Almasih; saamponna ganeka dhaggi' e bakto Salerana rabuwa pole, nyosol giliranna reng-oreng se tamaso' kaagunganna Almasih. 24 Saamponna ganeka pas keyamat. E bakto ganeka Almasih bakal makala'a sadajana pamarenta'an, sadajana kakobasa'an ban sadajana kakowadan; saamponna ganeka Salerana bakal massra'agiya kakobasa'anna menangka Rato, ka Jehovah, Ramana sampeyan sareng kaula sadaja. 25 Almasih kodu terros marenta kantos sadajana mosona Almasih sareng Jehovah epatellok ka Almasih. 26Moso se dhi-budhi kadibi' se epatelloga enggi paneka pate.

**2 Korintus 1:9,10 rassana akadi se eokom mate. Nangeng kadaddiyan ganeka kalakon sopaja kaula sadaja ta' ngandellagi kakowadan dibi', nangeng ngandellagi kakowadanna Jehovah se maodhi' oreng mate. 10 Salerana panyalamet kaula sadaja dhari babaja pate se raja ka'issa'. Ban Salerana jugan se masalamedda kaula sadaja dhaggi' e budhi are, sabab kaula sadaja ngarep ka Salerana.**

**2 Korintus 3:6 Salerana se masanggup kaula sadaja daddi abdina settong parjanjiyan se anyar; parjanjiyan se agantong ka Errohna Jehovah, banne ka hokom se etoles. Sabab se etoles ganeka madhateng pate, dineng Errohna Jehovah madhateng odhi'.**

**Kolose 1:21,22 Gi' dhimen sampeyan jau dhari Jehovah, sampeyan ngamoso Salerana sabab pekkeranna sampeyan jahat. 22 Nangeng samangken, kalaban sedana Potrana, Jehovah masae pole hubunganna sampeyan sareng Salerana. Kalaban sapaneka sampeyan bisa ebakta ngadhep ka ajunanna Jehovah e dhalem kabadha'an socce, morne sareng tadha' calena.**

**Ibrani 2:9 Nangeng sampeyan sareng kaula sadaja ampon nengale Isa se daddi pangobasa. Salerana epamandhaban sakone' dhari malaekat namong sakejja', sopaja kalaban kasaeyannepon Jehovah Salerana bisa**

**seda kaangguy sadajana manossa. Sampeyan sareng kaula nengale Salerana samangken eparenge kadhudhugan se molja ban kahormat polana Salerana nanggung sangsara kantos seda.**

**Ibrani 2:14,15 Sarrena reng-oreng se sareng Isa eseddit ana' ganeka mahlok manossa se bisa mate, Isa dibi' daddi padha sareng manossa ban odhi' e dhalem kabadha'an manossa. Salerana alampa'agi sapaneka sopaja kalaban sedana, Isa bisa maancor Iblis se ngobasae pate. 15 Kalaban sapaneka Salerana mabebas reng-oreng se saomorra ekadunor polana tako' ka pate.**

**Ibrani 11:5 Polana andhi' iman, Henokh ta' seda, nangeng epaongga ebakta ka Jehovah. Tadha' oreng settonga se manggi salerana, sabab salerana ampon epaongga sareng Jehovah. E dhalem Alketab esebuttagi ja' sabellunna Henokh epaongga, salerana masenneng panggaliyanna Jehovah.**

**1 Petrus 3:18 Sabab Almasih seda namong sakaleyen, kaangguy saterrossa lantaran dusana manossa, oreng se tadha' salana seda polana reng-oreng se sala, sopaja Salerana kengenga nonton sampeyan ka Jehovah. Almasih epate'e badannepon, epaodhi' pole sacara rohani.**

**2 Petrus 1:3 Jehovah kalaban kobasa Illahina marenge sampeyan sareng kaula sadaja sabarang se ekaparlo kaangguy odhi' abakte ka Salerana. Salerana alampa'agi paneka kalaban jalan pa-ponapa se ekaonenge sampeyan sareng kaula sadaja parkara Isa Almasih, se nembali sampeyan sareng kaula sadaja sopaja bisa noro' ane'madi kamolja'an sareng kasaeyanna.**

**1 Yahya 3:14 Sampeyan ban kaula padha oneng ja' sampeyan ban kaula sadaja ampon kalowar dhari pate, ban ngalle ka dhalem odhi'. Sampeyan ban kaula oneng parkara ganeka polana sampeyan ban kaula sadaja taresna ka sasama taretanna. Oreng se ta' taresna, artena gi' ekobasae pate.**

**1 Yahya 5:11 Paneka' kasakseyan ganeka: Jehovah ampon marenge ka sampeyan ban kaula sadaja odhi' saongguna ban se langgeng, ban Pottrana ganeka somberra odhi' ka'issa'.**

**Wahyu 21:6 Salerana pas adhabu, "La mare! Sengko' se dha'-adha' ban se dhi-budhi; Sengko' Pangeran dhari awwal sampe' aher. Saneyap oreng se pelka' bi' Sengko' eberri'ana ngenom ma-coma dhari somberra aeng se madhateng odhi'.**